



Embaixada EUA Dili Fornese Ekipamentu Médiku hodi Ajuda Profisionál Saúde sira iha Liña Frente Fó Tratamentu ba Pasiante COVID-19 sira

BA DIVULGASAUN IMEDIATA

28 Abril 2021

*Atu hetan informasaun klean liután, kontaktu ba Caleb Portnoy, Ofisiál Asuntu Públiku no Rosario Maia, Espesialista Mídia, Embaixada E.U.A., Dili, Timor-Leste
Tel: +670 332 4684, 77908209 maiarg@state.gov*

DILI, 28 Abril 2021 – Embaixada Estados Unidos iha Timor-Leste fó doasaun Máquina Presaun Pozitiva Kontínua Vias Respiratórias (CPAP) hamutuk 20 no Kapus Terapia Oksijéniu lubuk ida ba Governu Timor-Leste nia Gabinete Sentru Integradu Jestaun Krize hanesan parte ida husi Embaixada nia apoiu kontínua ba Timor-Leste nia resposta hasoru pandemia COVID-19. Durante pandemia ne’e, médiku Amerikanu sira iha Universidade Rhode Island konverte ona mákina CPAP hodi uza ba trata problema respiratóriu ho forma foun tratamentu oksijéniu la invazivu ba pasiente COVID-19 sira. Ekipamentu hirak ne’e sei permite profisionál saúde liña frente sira bele fornese terapia oksijéniu ne’ebé ema barak karik bele presiza. Sasán hirak ne’e entrega husi Embaixadór E.U.A. Kevin Blackstone no Xefe Gabinete Kooperasaun Defeza Major Pablo Valerin ba Brigadeiru Jenerál “Aluk” Descartes.

“Estados Unidos oferese daudaun ekipamentu médiku importante hirak ne’e ba governu Timor-Leste hodi ajuda hatán ba COVID-19” dehan Embaixadór E.U.A. Kevin Blackstone”. “Sasán hirak ne’e komprova ona uza ho di’ak tebes iha tratamentu ba pasiente COVID-19 sira iha Estados Unidos. Sasán doasaun hirak ne’e sei fó ba espesialista sira kuidadu saúde nian opsaun tratamentu oioin enkuantu ita hotu luta hamutuk hasoru pandemia ida-ne’e.”

Sasán hirak ne’ebé fornese husi Universidade Rhode Island no Guarda Nasionál Rhode Island, halo parte iha Programa Parseria Estaduál (SPP) ne’ebé estabesele entre Rhode Island no Timor-Leste. SPP nu’udar Ministériu Defeza E.U.A. nia programa

kooperasaun seguransa ne'ebé liga Guarda Nasionál husi Estadu ida ka territóriu ida E.U.A. nian ho forsas armadas, forsa seguransa, ka ajénsia governamentál husi país parseiru ida atu responde ba emerjénsia no dezastre sira. Dadaun ne'e ho tinan 27, programa refere oferese relasaun kooperasaun, ho benefísiu ba parte rua no dura ba tempu naruk entre Estadu ida-idak Estados Unidos nian no nasaun parseiru sira iha mundu tomak.

Projetu ne'e mai aumenta tan ba montante liu millaun \$1,6 ne'ebé Estados Unidos kompromete ona hodi tulun Governu Timor-Leste kombat hasoru COVID-19 no montante inisiál biliaun \$2, husi planu total biliaun \$4, hodi apoia Kompromisu Avansadu ba Merkadu COVAX nian, ne'ebé sei apoia distribuisaun vasina COVID-19 ba país sira liu 90 inklui Timor-Leste.